

18. okt. 2016

Kingusinnerpaamik 1. januar 2017 aallarnerfigalugu ukiuni tallimani misiligummik terian-nissat, tulukkat naajallu eqqissisimatinneqarunnaarallarnissat pillugu Naalakkersuisut peq-quneqarnissaannik Inatsisartut aaliangiiffigisassaattut siunnersuut. Misileraanerup naareer-simalernerani misileraanerup kingunerisaasa sunniutai pillugit nalilersuiffiginerat saqqum-miunneqassalluni, ilaatigut eqqissisimatitsinerup atorunnaavissinnaanera pillugu nalilersui-soqassalluni.

(Inatsisartunut ilaasortaq Anthon Frederiksen, Partii Naleraq)

Siumumiik imaattumik oqaaseqarfigissavarput.

Uumasut ajoqutaasutut taaneqartalersimasut matumani siunnersuummi pineqartut, ukiuni siusin-nerusukkut nunatsinni pingaaruteqarsimaqaat pingaartumik Naajat Teriannissallu, Nunatsinnillu ilisimasalittut imminnut taasut uumasut taaneqartut pisariaqartinneqarnerat pingaaruteqarnerallu inuiaqatigiit eqqorneqaatigisaattut taassariaqartumik eqqissisimatinneqartalersimapput, tamannalu uumasunut allanut pinngitsoortitsiniartariaqarnitsinnik tikkuussivoq. Nunap immallu uumasuiniq qangaanniilli piniagassaqaartuarnissarput siaaatta qulakkeerniartuarsimammassuk ingerlateqqittuar-simallugulu annertuumik qutsavissaraavut sulilu kinguaariit tulliinut uagut ingerlatitsiuartaria-qarluta.

Siunnersuutaasulli uumasut eqqorpoq annertuumik aammalu annikinnerusumik ajoqutaalersi-mammata iliuuseqarfigineqartariaqarlutik, ilaatigut Kommunit akiuiniarnerminni uumasut taane-qartut ikilisarneqarnissaat tunngavigalugu aningaasaliisarput, malunnarsiartorporli Kommunit akiui-niarnerat annikilliarortoq, taamaattumillu sulii siunissami annertunerusumik uumasut taaneqartut ajornartorsiutaajartornissaat eqqoriarsinnaavarput.

Aamma eqqorpoq uumasut nunatta sineriarujussuani uumasut allat eqqarsaatigalugit assut akornu-taalersimasut pingaartumik piaqqiorfiit eqqarsaatigalugit, tamannalu allanngortissagutsigu iliuu-sissat eqqartorluartariaqarpavut, siunnersuullu aqutigineqarsinnaasutut aamma nalilersorluartari-aqarlutigu, nunattalu pisuussutaanik ilitsoqqussaralugu nerisarineqartut allaat piniarneqarnerannik annikillisaalluni inuiaqatigiinnut atugassaqaartitsiviusumi uumasut annertuumik akornutaasut ingalassimatinneqartarnerat ikinnerpaaffimminiinnissaallu qangarsuaaniit atugaavoq.

Assersuutigilara Amaroq; piniartut qangaaniit ajornanngippat ingerlaannaq pisarineqartarnissaa kissaataaniittuarterpoq piniarfimminnut pisimatillugu, matumanilu siunnersuutigineqartumi allanneqanngikkaluartoq ilanngullugu Siumumit nalilersoqqarput, avannaani pingaartumik Qaanaap eqqaani tuttoqarfinnik umimmaqarfinnillu piniartut pinialuttartullu piniarfigisinnaasaanni akornutaalluinnalersimmata, inoqarfinnillu apuuttualernerat nalinginnaalersimalluni, eqqissisi-matitaallutillu ukioq tamaat pisarineqarsinnaalertariartut Siumumiitsumaarpugut.

Nunatsinnilu issittumi uumasut kunngiattut taasinnaasarput Nanoq, allaat pisassat ikittuinnaa-sarnerisa kingunerannik, inoqarfinni ajoqutaasutut allaat aamma takornartaajunnaarsimavoq,

inoqarfinni inunnik annertuumik ernumanartorsiortitsisalersimalluni. Tamakku ilanngullugit pinaveersimatinneqarnissaannut allannguisoqarsinnaanera misissorneqarsinnaasariaqarpoq.

Taamaattumik uumasut siunnersuummi taaneqartut akornutaalersimaqisullu ukioq tamaat pinia-gaasinnaanerat qanoq isikkulimmik takujuminaatsillutigu Siumumit maanna kommunit sisamaasut aammalu Aalisartut Piniartullu kattuffii marluusut tapertaralugu piniartartut kattuffiat peqatigalugit Namminersorlutillu Oqartussat iliuusaasinnaasunik nassaarniaqatigiittariaqartut kaammattuutigeru-supparput. Ukiormi tamaat ammaraluarutsigit piniarneqarnissaat kajungerineqanneqimmat iluatsippallaarnaviarsorinnginnatsigu.

Kommunilli aningaasaliisarsimanerat iluaqutaasarsimasoq qanoq assingusumik tamatta peqataaf-figisinnaasatsinnik nassaartariaqarpugut.

Qulaani taasavut Siumumit tunngavigalugit siunnersuut uumasut imminnerminnut oqimaqati-giittarnerannik innarleqqasoqalersimammat isumaqataaffeqarfigigatsigulu, Ataatsimiititaliamut susassaqartumut aappassaaneernejartinnani ingerlatinneqassasoq innersuussutigaarput.

Karl-Kristian Kruse
Siumut